

UVOD

Knjigovodstvo je računska osnova menadžmenta računovodstva i njegov zadatak je da obezbijedi sve podatke neophodne za različite dijelove računovodstva (i finansijskog i upravljačkog). Cilj knjigovodstva uvijek zavisi od cilja preduzeća a to su uglavnom: utvrđivanje rezultata poslovanja, stanje imovine, podaci za kontrolu rada, za planiranje poslovanja i kontrolu izvršenja planskih veličina.

Ono treba da bude organizovano tako da zadovolji i eksterne i interne korisnike informacija o poslovanju preduzeća.

S obzirom na to, knjigovodstvo prati tokove dobara i novca u preduzeću, i njegov osnovni zadatak je da registruje i bilježi poslovne događaje. Grubo rečeno, knjigovodstvene evidencije su baza podataka na osnovu kojih se utvrđuju stanje i struktura imovine preduzeća, rezultat poslovanja sa stanovišta osnovnog cilja poslovanja, tj. stvaranja dobiti, finansijske obaveze prema drugim pravnim i fizičkim licima, potraživanja od drugih pravnih i fizičkih lica, ispunjenje obaveze prema državi (porezi, takse i dr.). Knjigovodstveni podaci su osnov za izradu bilansa iz kojih se vidi stanje imovine i uspješnosti poslovanja (bilans stanja i bilans uspjeha).

Da bi navedene ciljeve ostvarilo, knjigovodstvo mora da prikupi informacije o svim nastalim poslovnim događajima, tačnije da prikupi dokumenta koja dokazuju nastanak poslovnih događaja. Nakon provjere ispravnosti dokumenata, ona se klasifikuju prema poslovnim događajima na koje se odnose. Potom se poslovni događaji evidentiraju po hronologiji i konačno po proteku određenih, po pravilu jednakih vremenskih perioda (mjesečno, kvartalno, polugodišnje, godišnje), sastavlja izvještaje o stanju imovine i o ostvarenom finansijskom rezultatu.

U ovom radu ćemo se osvrnuti na dvojno knjigovodstvo. Dvojno knjigovodstvo (engl. *double-entry book-keeping (recording)*, njem. *doppelte Buchführung*) je sastav evidentiranja poslovnih promjena po kojem se svaka poslovna promjena (koja zadovoljava uslove evidentiranja) iskazuje na (barem) dva konta, od kojih barem jedan konto duguje i barem jedan potražuje. Princip dvojnog knjigovodstva jedan je od osnovnih principa računovodstva.

Sve što je naprijed navedeno o pojmu knjigovodstvo, poslužiće nam kao uvod u razmatranje ovog diplomskog rada te u tom kontekstu će se istaći osnovne karakteristike i značaj knjigovodstvene evidencije.